

# **RUKOMETNI SAVEZ BOSNE I HERCEGOVINE**



## **PRAVILNIK O DRŽAVNIM REPREZENTACIJAMA**

# **RUKOMETNI SAVEZ BOSNE I HERCEGOVINE**

Upravni odbor RSBiH na osnovu odredbi statuta donosi:

## **PRAVNILNIK O DRŽAVNIM REPREZENTACIJAMA**

### **1. OSNOVNE ODREDBE**

#### *Član 1*

Rukometne reprezentacije RSBiH (u daljem tekstu, reprezentacije) su reprezentativne selekcije igrača svih uzrasnih kategorija u muškoj i ženskoj konkurenciji i stručno-tehničkog rukovodstva koji se formiraju radi prezentovanja rukometnog sporta BiH na međunarodnoj sceni.

### **2. REPREZENTACIJE PO UZRASNIM I DRUGIM KATEGORIJAMA**

#### *Član 2*

- seniorska, "A" selekcija
- U20
- U18
- U16
- U14

Rasponi godišta za navedene selekcije se formiraju u skladu sa pravilima IHF-a i EHF-a. Reprezentacije se mogu formirati i na osnovu drugih kriterija u skladu sa potrebama takmičenja, a u cilju ostvarivanja interesa rukometnog sporta BiH ("B" reprezentacija, reprezentacija lige, mediteranska reprezentacija i dr.).

Odredbe ovog pravilnika se odnose i na reprezentacije u rukometu na pijesku i mini rukometu.

### **3. SASTAV REPREZENTACIJE**

#### *Član 3*

Reprezentacije čine igrači/ce (u daljem tekstu, reprezentativci/ke) odgovarajuće uzrasne i polne kategorije i članovi stručno-tehničkog rukovodstva.

#### *Član 4*

Reprezentativci/ke su igrači/ce odgovarajuće uzrasne, polne i druge organizacione kategorije koji su, kao najuspješniji i najbolji, izabrani da reprezentuju rukometni sport u BiH.

Reprezentativce za svaku posebnu uzrasnu, polnu i drugu kategoriju biraju selektori tih reprezentacija. O pozivu za reprezentaciju, reprezentativac i njegov klub se obavještavaju u pisanoj formi, elektronskom poštom, putem telegrama, faksa i dr., ili objavom poziva na zvaničnoj web stranici RSBiH. Reprezentativac mora biti državljanin BiH te mora da posjeduje sportske i moralne kvalitete koji ga čine dostojnim da reprezentuje rukometni sport u BiH.

Reprezentativac može otkazati učešće u reprezentaciji samo iz naročito opravdanih razloga koje mora dostaviti u pisanoj formi sa obrazloženjem, a koje cijeni selektor reprezentacije, dok u suprotnom odgovara u skladu sa adekvatnim pravilnikom RSBiH. U slučaju bolesti i sportskih povreda reprezentativca, opravdanost za izostanak sa priprema i takmičenja reprezentacije utvrđuje isključivo doktor reprezentacije kojem reprezentativac i njegov klub moraju da dostave podatke od značaja za ocjenu opravdanosti i odsustva reprezentativca, o čemu doktor reprezentacije pismenim putem obavještava selektora reprezentacije.

#### *Član 5*

Selektor svake reprezentacije iz redova reprezentativaca bira kapitena i, po potrebi, zamjenskog kapiten reprezentacije, koji kao prvi među jednakima pružaju pomoć i podršku reprezentativcima u ostvarivanju svojih prava i obaveza i uspostavljanju odnosa međusobnog povjerenja i saradnje sa svim članovima odgovarajuće reprezentativne selekcije.

#### *Član 6*

Svi reprezentativci su obavezni:

- da se sportski i korektno ponašaju i u potpunosti zalažu za ostvarivanje što boljih rezultata reprezentacije
- da poštuju i striktno se ponašaju u skladu sa pravilima ponašanja koje po hijerarhijskom sistemu određuju direktor i selektor reprezentacije
- reprezentativcima je najstrožije zabranjeno korištenje dopinga, konzumiranje droge i drugih zabranjenih sredstava u skladu sa pravilima IHF/EHF-a, MOK-a i drugih sportskih organizacija
- za disciplinske i druge prekršaje za vrijeme priprema i takmičenja, reprezentativci odgovaraju u skladu sa disciplinskim pravilnikom RSBiH
- selektor reprezentacije može donijeti odluku o privremenom udaljenju reprezentativaca iz sastava reprezentacije do pokretanja provedbe za podnošenje disciplinske prijave protiv reprezentativaca.

### *Član 7*

Reprezentativci su naročito obavezni:

- da grade, poštuju i održavaju ugled, kult i pozitivan imidž reprezentacije i RSBiH u cjelini
- da vode računa o svom ličnom ugledu i ugledu ostalih članova reprezentacije kao i o potrebi pozitivne medijske prezentacije rada i rezultata reprezentacije u svim segmentima, kako na ličnom, tako i na opštem nivou
- reprezentativci kao i svi drugi članovi reprezentacije su posebno obavezni da čuvaju kao službenu tajnu sve podatke i okolnosti koje se odnose na rad i aktivnosti reprezentacije, koje direktor i selektor reprezentacije definišu kao službenu tajnu, a čija povreda se kažnjava na najstrožiji način u skladu sa postojećim pravilnicima RSBiH
- reprezentativci su dužni da poštuju i realizuju sva pravila ponašanja koja odredi direktor i selektor reprezentacije prilikom boravka na pripremama, takmičenjima, putovanjima, uključujući poštovanje zakazanih tajminga i dress code-a, kao i poštovanja međusobne i ex komunikacije.

### *Član 8*

Svaki reprezentativac je dužan da prilikom svakog odazivanja za nastup u nekoj od reprezentativnih selekcija dostavi zvaničnu putnu ispravu Bosne i Hercegovine, kao sredstvo neophodno za identifikaciju za odigravanje reprezentativnih utakmica.

## *Član 9*

Za dolazak na pripreme i službene nastupe, reprezentativci dobivaju naknade za putne troškove prema propisima RSBiH.

## *Član 10*

Za rad i uspjeh u radu, reprezentativcima i članovima stručno-tehničkog rukovodstva reprezentacije, mogu se dodijeliti priznanja i novčane nagrade. Visinu novčane nagrade, na prijedlog direktora, određuje UO RSBiH, a pojedinačne svote prema zaslugama određuju zajedno direktor i selektori reprezentacija.

## **4. STRUČNO-TEHNIČKO RUKOVODSTVO**

### *Član 11*

Stručno-tehničko rukovodstvo reprezentacije čine:

- direktor reprezentacija
- selektor A reprezentacije
- selektori ostalih reprezentativnih selekcija
- treneri reprezentacija
- tehnički sekretar reprezentacije
- medicinsko osoblje reprezentacije
- drugo stručno-tehničko osoblje reprezentacije.

## **5. DIREKTOR REPREZENTACIJE**

### *Član 12*

Direktor reprezentacija rukovodi radom i aktivnostima reprezentacija.

### *Član 13*

Upravni odbor RSBiH imenuje direktora reprezentacije posebno za muške i ženske reprezentacije. Direktor reprezentacija obavlja svoj posao kao stalni zaposlenik ili u drugom statusu, a prava, dužnosti, trajanje i uslovi za obavljanje djelatnosti se uređuju posebnim ugovorom.

Upravni odbor u vanrednim situacijama može imenovati jedno lice za direktora muških i ženskih selekcija reprezentacija na određeni vremenski period do imenovanja direktora ženske reprezentacije.

#### *Član 14*

Direktor reprezentacija je za svoj rad direktno odgovoran UO RSBiH, kojem podnosi pismene planove i izvještaje o određenim segmentima djelovanja i prisustvuje sjednicama UO RSBiH sa tom temom.

#### *Član 15*

Za direktora reprezentacija može biti izabrana osoba koja ima iskustvo na ovim i sličnim poslovima, koja govori jedan od službenih jezika EHF/IHF, ima zapažene rezultate u svom prijašnjem radu, posjeduje visoke moralne kvalitete i organizacione sposobnosti i koja poznaje strukturu djelovanja u rukometnom sportu.

#### *Član 16*

Na čelu m/ž reprezentativnih selekcija je direktor reprezentacija koji je za svoj rad direktno odgovoran UO RSBiH sa jasno uokvirenim nadležnostima, pravima i obavezama, a koji:

- organizuje i rukovodi svim segmentima djelovanja navedenih selekcija
- sprovodi smjernice i politiku UO RSBiH
- organizuje sistem finansiranja, planiranja, realizacije, marketinga, uspostavljanja pravila i normativa ponašanja sa ciljem postizanja što boljih rezultata, građenja pozitivnog imidža i opšte pozitivne slike reprezentacije
- precizira zaduženja u okviru reprezentativnih selekcija i stručno-tehničkog dijela
- uspostavlja saradnju i direktnu vezu sa finansijskim vijećem koje bi formirao, a koje bi obezbjeđivalo finansijska sredstva za realizaciju aktivnosti reprezentacija
- u saradnji sa selektorom formira medicinski tim reprezentacije
- formira administrativno-tehnički tim
- uspostavlja segment odnosa sa javnošću u dijelu koji se tiče reprezentativnih selekcija

- uspostavlja i održava komunikacijski sistem koji se tiče takmičarskog dijela i učešća reprezentacije u IHF/EHF sistemu
- precizira i uređuje međusobne odnose i pravila ponašanja u reprezentacijama s ciljem građenja i održavanja autoriteta i pozitivnog imidža reprezentacija i RSBiH u cjelini
- aktivira uspostavljanje reciprociteta između ostvarivanja zadatih ciljeva i uslova koji su neophodni za ispunjenje istih
- sačinjava finansijske planove i učestvuje u obezbjeđivanju i realizaciji navedenog segmenta sa naročitim akceptiranjem načela transparentnosti i odgovornosti
- uspostavlja sistem samofinansiranja u što većem obimu.

### *Član 17*

Direktor reprezentacija je zadužen za raspolaganje sredstvima sa posebnog podračuna u okviru glavnog računa RSBiH, a koji bi isključivo služio kao sredstvo putem kojeg bi se realizirale aktivnosti reprezentacija, za što bi, uz obaveznu primjenu načela zakonitosti, isplaniranosti, transparentnosti i izvještavanja, bio direktno odgovoran UO RSBiH te samim tim vodio brigu o finansijskom poslovanju, prihodima i troškovima reprezentacije.

### *Član 18*

Pored navedenog, poslovi i zadaci direktora su:

- ugovaranje i dogovaranje djelatnosti reprezentacija na osnovu plana i programa rada koje su izradili selektor A reprezentacije i selektori ostalih reprezentativnih selekcija
- sklapanje ugovora o pokroviteljstvu i sponzorstvu nad reprezentacijama
- dogovaranje i sklapanje ugovora o sportskoj opremi za reprezentacije
- ugovaranje TV prenosa reprezentativnih utakmica i njihova marketinška obrada
- briga o zastupljenosti reprezentacije u medijima.

### *Član 19*

Direktor reprezentacija obavlja i ostale poslove za reprezentaciju, koji nisu predviđeni ovim pravilnikom, a zadaje ih UO RSBiH te saraduje sa generalnim sekretarom RSBiH.

### *Član 20*

Direktor reprezentacija za svoj rad ima pravo na odgovarajuću naknadu, koju određuje UO RSBiH, a koja se precizira *međusobnim ugovorom*.

#### *Član 21*

Direktor reprezentacija može biti razriješen te funkcije na sopstveni zahtjev, ili ako ne izvršava svoje obaveze iz zaključenog ugovora, ili ako na drugi način postane nedostojan da dalje obavlja tu funkciju.

### **6. SELEKTOR/IZBORNIK REPREZENTACIJE**

#### *Član 22*

Selektor reprezentacije je stručno osposobljena osoba koja neposredno upravlja stručnim radom reprezentacije.

#### *Član 23*

Selektora reprezentacije imenuje UO RSBiH uz prethodno objavljeni javni konkurs ili na prijedlog stručne komisije ili direktora reprezentacije bez objavljenog konkursa.

Selektor reprezentacije obavlja svoj posao kao stalni zaposlenik ili kao dodatnu djelatnost uz naknadu. Visinu naknade, na prijedlog direktora reprezentacije, određuje UO RSBiH.

#### *Član 24*

Selektor reprezentacije se imenuje posebno za mušku i žensku reprezentaciju, a za svoj rad je odgovoran, putem stručne komisije i direktora reprezentacije, UO RSBiH.

#### *Član 25*

Selektor reprezentacije, pored opštih, treba da ispunjava i ove uslove:

- ima najmanje zvanje višeg rukometnog trenera
- ima zapažene rezultate u stručnom radu sa vrhunskim ekipama
- služi se jednim od službenih jezika IHF/EHF-a



- spremno i stručno zastupa razvoj rukometa
- ima zapažene rezultate u radu sa ekipama na evropskom i svjetskom nivou
- posjeduje sportske i moralne kvalitete te ugled u rukometnom sportu.

#### *Član 26*

Selektor reprezentacije se imenuje po pravilu na vrijeme od 4 (četiri) godine – jedan olimpijski ciklus, a nakon isteka tog roka selektor reprezentacije može biti ponovo izabran na tu funkciju. Selektor reprezentacije može biti razriješen dužnosti prije isteka mandata ako zbog neostvarenja plana i programa rada izostanu zadovoljavajući rezultati reprezentacija te ako svojim djelovanjem narušava ugled reprezentacije, a posebno ugled Bosne i Hercegovine te zbog razloga predviđenih zakonom ili međusobno sklopljenim ugovorom.

#### *Član 27*

Status, prava i obaveze selektora reprezentacije, bliže se određuju posebnim ugovorom koji se zaključuje između selektora reprezentacije i predsjednika UO RSBiH ili sa direktorom reprezentacija po ovlaštenju UO RSBiH.

#### *Član 28*

Ako selektor reprezentacije podnese ostavku ili mu iz nekog drugog razloga prestanu obaveze, UO RSBiH, na prijedlog stručne komisije i direktora reprezentacija, imenuje vršioca dužnosti do imenovanja novog selektora reprezentacije.

#### *Član 29*

U saradnji sa stručnom komisijom i direktorom reprezentacija, selektor mora u roku od 30 dana od imenovanja predložiti trenera – saradnika te trenere reprezentacija mlađih selekcija, a UO RSBiH prihvata ili odbija prijedlog selektora. U slučaju da UO RSBiH ne prihvati prijedlog selektora, stručna komisija u dogovoru sa direktorom reprezentacija, u roku od 15 dana dostavlja UO RSBiH usklađeni prijedlog kada UO donosi neopozivu odluku.

#### *Član 30*

Poslovi i zadaci selektora:

- izrada godišnjeg plana rada sa reprezentacijama koje razmatra stručna komisija i direktor reprezentacija, a koji usvaja UO RSBiH
- određuje širi popis reprezentativaca za svako nastupajuće razdoblje
- određuje užu spisak reprezentativaca za predstojeći nastup reprezentacije
- stručno vođenje treninga i utakmica reprezentacije
- izrada pojedinačnih planova rada reprezentativaca u klubovima i nadzor nad provedbom programa
- prati rad, formu i rezultate reprezentativaca i reprezentativnih kandidata.

### *Član 31*

Selektor koordinira, usmjerava i prati rad selektora i trenera mlađih selekcija i mogućih kandidata za reprezentaciju te ostvaruje saradnju sa klupskim trenerima.

### *Član 32*

Selektor reprezentacije radi na cjelokupnom stručnom usavršavanju, prati i primjenjuje međunarodne stručne progrese u rukometnom sportu, učestvuje u radu stručnih seminara, koristi i primjenjuje savremenu naučno-stručnu metodologiju u svom radu i brine se za sprovođenje istih u mlađim reprezentativnim selekcijama.

### *Član 33*

Selektor reprezentacije pisane izvještaje o svom radu, usaglašene sa stručnom komisijom RSBiH i direktorom reprezentacija, pravovremeno podnosi UO RSBiH.

### *Član 34*

Selektor reprezentacije obavezno sudjeluje u radu stručne komisije RSBiH.

### *Član 35*

Selektor reprezentacije na poziv direktora mora učestvovati u radu sjednice UO RSBiH ukoliko je UO RSBiH procijenio da je njegovo prisustvo neophodno.

## **7. SELEKTORI – TRENERI MLADJIH SELEKCIJA**

### *Član 36*

Selektori – treneri mlađih reprezentativnih selekcija se biraju u skladu sa Članom 29 ovog pravilnika.

#### *Član 37*

Selektori – treneri mlađih reprezentativnih selekcija rade i djeluju u skladu sa Članom 31 ovog pravilnika i staraju se za provedbu Članova 5, 6 i 7 ovog pravilnika te imaju pravo na primjenu Člana 10 ovog pravilnika.

#### *Član 38*

Selektori – treneri mlađih reprezentativnih selekcija pored vođenja stručno-takmičarskog segmenta moraju posebno voditi računa o obrazovno-odgojno-edukativnom elementu, s obzirom da rade sa reprezentativcima mlađe dobi te da, kao takvi, promovišu i štite univerzalne sportske i ljudske vrijednosti te da kontinuirano posvećuju pažnju građenju i održavanju integriteta i pozitivno-motivacijskog imidža reprezentacija u sastavu RSBiH.

#### *Član 39*

Selektori – treneri mlađih reprezentativnih selekcija su dužni sačinjavati planove i programe svog rada u koordinaciji sa selektorom A selekcije te ih blagovremeno dostavljati direktoru reprezentacija radi planiranja aktivnosti.

#### *Član 40*

Selektori – treneri mlađih reprezentativnih selekcija imaju prava i obaveze koje će izdefinisati sa direktorom reprezentacija u skladu sa Članovima 14 i 16 ovog pravilnika.

## **8. TEHNIČKI SEKRETAR I ADMINISTRATIVNO-MARKETINŠKA PODRŠKA**

#### *Član 41*

Tehničkog sekretara reprezentacije kao i administrativno-marketingšku podršku imenuje direktor reprezentacija u saglasnosti UO RSBiH, a u skladu sa Članovima 14 i 16 ovog pravilnika.

#### *Član 42*

Tehnički sekretar reprezentacije i administrativno-marketingški tim sprovode cjelokupnu podršku iz domena navedenog segmenta i staraju se za

omogućavanje djelovanja reprezentacije u odgovarajućim uslovima i za svoj rad su odgovorni direktoru reprezentacija u skladu sa Članovima 14 i 16 ovog pravilnika.

#### *Član 43*

Tehnički sekretar i administrativno-marketinški tim podliježu odredbama iz Članova 5, 6, 7 i 31, a imaju pravo na primjenu Člana 10 ovog pravilnika.

#### *Član 44*

Tehnički sekretar i administrativno-marketinški tim imaju prava i obaveze koje će izdefinisati sa direktorom reprezentacij u skladu sa Članovima 14 i 16 ovog pravilnika

### **9. ZDRAVSTVENA ZAŠTITA**

#### *Član 45*

O zdravstvenoj zaštiti reprezentativaca, brigu vodi glavni doktor reprezentacije kojeg, u dogovoru sa selektorom, imenuje direktor reprezentacija u saglasnosti UO RSBiH, a u skladu sa Članovima 14 i 16 ovog pravilnika.

#### *Član 46*

Doktor reprezentacije u saradnji sa ostalim medicinskim osobljem (fizioterapeuti i dr.) pruža zdravstvenu zaštitu reprezentativcima na pripremama, trenizima i utakmicama na najbolje izvodiv način.

#### *Član 47*

Doktor reprezentacije saraduje sa doktorima klubova iz kojih dolaze reprezentativci, a ima pravo na uvid zdravstvenog stanja reprezentativaca ili kandidata za reprezentaciju.

#### *Član 48*

Doktor reprezentacije mora voditi adekvatnu zdravstvenu evidenciju reprezentativaca i kandidata za istu i imati ažuriran uvid u njihovo zdravstveno stanje.

#### *Član 49*

Doktor reprezentacije koordinira rad fizioterapeutskog tima.

#### *Član 50*

Doktor reprezentacije neposredno saraduje sa selektorom reprezentacije, a za svoj rad je odgovaran direktoru reprezentacija.

#### *Član 51*

Na sve članove zdravstveno-medicinskog tima se u potpunosti odnose Članovi 5, 6, 7 i 31 ovog pravilnika kao i prava iz Člana 10 ovog pravilnika.

#### *Član 52*

Doktori reprezentacije imaju prava i obaveze koja će izdefinisati u skladu sa direktorom reprezentacija u skladu sa Članom 14 i 16 ovog pravilnika.

#### *Član 53*

Svi članovi reprezentacije u osigurani posredstvom RSBiH u jednoj od osiguravajućih kuća, a za provedbu navedenog se stara generalni sekretar RSBiH.

### **10. SPORTSKA OPREMA I ODJEĆA**

#### *Član 54*

RSBiH, a u skladu sa Članom 18 ovog pravilnika, osigurava reprezentativcima svu potrebnu opremu za pripreme, vježbanje i utakmice. Prema mogućnostima osigurava i opremu za slobodno vrijeme kao i odjeću za svečane prilike. Reprezentativci moraju, tokom svih akcija reprezentacije, nositi isključivo opremu i odjeću koju je nabavio RSBiH, a nakon završenih akcija, svaki reprezentativac je dužan opremu vratiti ovlaštenoj osobi. Opremu su dužni čuvati.

### **11. ZAKLJUČNE ODREDBE**

#### *Član 55*

O provedbi odluka ovog pravilnika, brine se direktor reprezentacija, a o eventualnom kršenju istog, izvještava UO RS BiH.

*Član 56*

Ovaj pravilnik stupa na snagu danom donošenja.

***Predsjednik Upravnog odbora RSBiH***